

Chantun va en direcziun da cifras cotschnas

In augment da las taglias chantunalas daventa pussaivel

(anr/rgd) L'emprim di da la sessiun da favrer ha il cussegl grond entschet a debattar il program da la regenza per ils onns 2017 en fin 2020. Il program n'è en sasez betg dispitivel, singuls puncts èn dentant vegnids criticads. Il parlament ha entschet a prender enconuschientscha dal program da la regenza per ils onns 2017 en fin 2020. La regenza suttametta al parlament mintga quatter onns in tal program ed il plan da finanzas. «Il program da la regenza è in instrument essenzial per la strategia da la regenza grischuna», ha ditg il president da la regenza *Christian Rathgeb*.

Program strategic per la politica chantunala

Il program da la regenza vegn elavurà da la regenza ensemen cun il cussegl grond. En la sessiun d'avust ha il parlament definì ils differents aspects principals da la strategia politica dal chantun Grischun. Uschia duai la politica tgirar l'ambient economic en il chantun. Quai vul ella far per exempel cun metter a disposiziun terren per firmas ed interpresas. Il turissem sco pìtga principala da l'economia grischuna duai pudair profitar da bunas cundiziuns da basa. D'impurtanza essenziala per il chantun è er la producziun d'energia idraulica. Malgrà la situaziun actuala plitost difficila per ils furniturs

d'energia idraulica considerescha la regenza quest sector sco degn da vegnir mantegnì e promovì. In ulteriur aspect per sustegnair il svilup economic vesa la regenza en ina buna planisaziun dal territori. Regiuns periferas duain profitar tant sco pussaivel da las consequenzas d'ina buna planisaziun territoriala. Plinavant vul la regenza s'engaschar per la segirtad sociala, il sector da la sanadad e quella da la scolaziun. «La regenza ha definì in program variant e spera ch'il parlament al resguardia da maniera positiva», ha ditg il president da la regenza grischuna *Christian Rathgeb*. A quest giavisch è il parlament suandà e n'ha betg contestà l'entrada en debatta.

Situaziun finanziaria critica

Prevesibla è ina situaziun finanziaria difficila durant ils proxims onns. A partir da l'onn 2018 quinta la regenza cun deficits da var 80 fin 100 milliuns l'onn. En vista a questa situaziun pretendan pliras fracziuns dal cussegl grond da definir ed introducir ina strategia per quests onns. La ministra da finanzas grischuna *Barbara Janom Steiner* ha intunà la necessitad da prender mesiras per franar quest svilup. «Probablmain stuain nus suttametter l'onn 2018 al parlament in program da distgargia da las finanzas chantunalas.» Cunzunt la fracziun da

la Partida liberaldemocrata insista sin in plan per pudair surventscher quests onns. «Il program da la regenza è reactiv enstagl d'esser proactiv», ha criticà il president da la città da Cuir, *Urs Marti* (pld).

Augment da taglias na vegn betg pli exclus

La debatta en detagl dal parlament è stada fitg engaschada. Deputads da l'entir spectrum politic han prendì l'ocasiun da s'exprimer. *Bruno Claus* (pld, Cuir) ha dumandà la regenza schebain ella haja planisà en vista a las finanzas precaras in augment dal pe da taglia. Cussegliera governativa *Janom Steiner* n'ha betg exclus in augment da las taglias chantunalas sin 105 perentschient da las taglias federalas. Sin quest nivel as rechattavan las taglias chantunalas fin l'onn 2009. In augment dal pe da taglia vegnia dentant introduci be per il cas che quai saja absolutamain necessari. Era pussaivla è tenor la cussegliera governativa che las taglias per firmas stoppian vegnir sbassadas sch' ils chantuns vischins decidian il medem pass. «Per restar cumpetitivs stuain nus eventualmain sbassar las taglias da gudogn per persunas giuridicas», ha ditg *Barbara Janom Steiner*. Il parlament cuntinuescha oz a debattar davart il program da la regenza 2017–2020.